



FEM Lancar 29 Buku



Timbalan Naib Canselor Jaringan Industri dan Masyarakat, Prof. Tai Shzee Yew memperkatakan sesuatu kepada Timbalan Menteri Pengajian Tinggi, Dato' Saifuddin Abdullah ketika melawat pameran buku terbitan FEM, UPM.

SERDANG, 13 Okt – Fakulti Ekologi Manusia (FEM), Universiti Putra Malaysia (UPM) telah melancarkan 29 buah buku penyelidikan yang dihasilkan oleh staf akademiknya dalam usaha meningkatkan kuantiti dan kualiti penyelidikan.

Antara tajuk penerbitan yang dihasilkan adalah 'Turning Perspectives of South East Asian Music Practices' (Gisa Jahnichen & Chan Cheong Jan), 'Masyarakat dan Kepelbagaian Sosial di Malaysia' (Sarjit Singh & Lee Yok Fee), 'Gender In Everyday Life' (Jariah Masud) dan 'Kemahiran Asas dalam Praktis Kerja Sosial' (Samir Muhazzab Amin & Winny Abdullah).

Pelancaran buku tersebut telah berlangsung pada majlis perasmian Seminar dan Anugerah Hasil Penyelidikan FEM 2009 yang bertemakan 'Penyelidikan Ekologi Manusia Memacu Kemajuan Negara' di Dewan Seminar Al-Farabi, FEM UPM.

Timbalan Menteri Pengajian Tinggi, Dato' Saifuddin Abdullah berkata para ilmuwan di institusi pengajian tinggi agar menumpukan perhatian dalam bidang penyelidikan politik untuk membantu pihak yang terlibat.

"Sudah tiba masanya para ilmuwan menumpukan perhatian terhadap penyelidikan politik kerana sebahagian ahli dan pemimpin politik di negara kita ketandusan idea selain sering menafikan idea yang bernas.

"Justeru, buah fikiran daripada para ilmuwan yang diterjemahkan dalam bentuk penyelidikan dan penerbitan sedikit sebanyak saya yakin dapat membantu semua pihak," katanya pada majlis perasmian tersebut.

Sementara itu, Dekan FEM, Prof. Madya Dr. Laily Paim berkata bidang sains sosial tetap memainkan peranan yang sama penting dengan bidang-bidang yang lain terutamanya dalam usaha menangani permasalahan sosial dan meningkatkan kualiti hidup.

"Banyak manfaat yang dapat dikongsi bersama masyarakat melalui hasil penyelidikan dan penerbitan-penerbitan ilmiah kami yang wajar disebarluaskan untuk membantu negara dalam usaha memajukan negara," katanya.



Timbalan Menteri Pengajian Tinggi, Dato' Saifuddin Abdullah mengetuk gong bagi merasmikan Seminar dan Anugerah Hasil Penyelidikan FEM 2009.